



## Kap Kàu-iòk-pō Pō-tiú<sup>n</sup> Hōe-tâm Pò-kò

Tâi-lô-hōe Hōe-tiú<sup>n</sup>  
Lîm Chheng-siâng

Tâi-ke pêng-an, CTT.

Koan-û 2003/5/23 kap Tē<sup>n</sup> Liông-úi/Tiu<sup>n</sup> Jū-hông 2-ūi kàu-siū khì kìn KIP(Kàu-iòk-pō) pō-tiú<sup>n</sup> ê chêng-hêng, góa í-keng tī tiān-ōe tiong kap Phek-siū hia<sup>n</sup> chham A-hūi kóng--kòe ah. Chit-má chò 1-kóá pór-chhiong pò-kò:

1. Gôan-pún Ún-giân kóng ū 1-ê phái<sup>n</sup> siau-sit, kóng KIP m̄-hō Jū-hông kap góa khì. Che kàu bōe--á piàn-chò m̄-sī sū-sít. Góa cha-hng-chái 7:30 khui-chhia khì Hô-pêng Tang-lō chiap Jū-hông. Iáu-bōe 8-tiám tō jip-khì KIP. Pō-tiú<sup>n</sup> ê ki-iàu pì-su chai-iá<sup>n</sup> góan sī chin-chêng ū kap pō-tiú<sup>n</sup> iok hó-sè ah, chin hó-lé, phâng sio-tê chhiá<sup>n</sup> góan tī pō-tiú<sup>n</sup> pān-kong-sek pi<sup>n</sup>--á ê choan-iōng hōe-gī-sek tán. Góan 2-lâng sī cha-hng-chái kìn pō-tiú<sup>n</sup> ê 7-ê-lâng lāi-té siōng chá kàu--ê: Tē<sup>n</sup> kàu-siū, Tiu<sup>n</sup> kàu-siū, góa, Chng Phek-lím lùtsu, Âng Úi-jîn kàu-siū, Iáu Êng-siōng kàu-siū, Chhòa Kim-an táng-sū-tiú<sup>n</sup>. Hiān-tiú<sup>n</sup> tong-jiân sī pō-tiú<sup>n</sup> Ng Êng-chhun chú-chhî, lēng-gōa ū 1-ê KIP ê hōe-gī kì-liòk jîn-ôan.
2. Ng pō-tiú<sup>n</sup> "khai-chhâng-pâi" kóng ê ōe kap A-hūi pò-kò: 5/21 pài-3 i chiap-kì<sup>n</sup> í Tiú<sup>n</sup>-ló kàu-hōe ūi-chú ê siā-ūn thôan-thé, iau-kiû chè-têng POJ chiâ<sup>n</sup>-chò piau-chún Tâi-ôan LMJ, tui-jîn POJ ê lék-sú tē-ūi kap thiat-siau í-chêng chèng-hú ūi-hóan hiàn-hoat ê kìm-chí/chhú-thê POJ ê hêng-chêng bêng-

lēng téng-téng ê sò-kiû, lóng kāng-khóan.

Tiôh-sī kóng, KIP bô khó-lêng chè-têng l-thò LMJ hō chôan Tâi-ôan ê lâng sú-iōng. He siōng-hó sī iû hák-sút thôan-thé gián-kiù liáu-āu, bān-bān-á hō siā-hōe tāi-chiòng chiap-siū, chū-jiân hêng-sêng, bô pit-iàu chèng-tī lék-liōng kàijip. M̄-koh, i koh théh-khí, KIP beh tī chòe-kīn ê chiong-lâi pêng-kàm í-keng chhut-pán ê bô-gí kàu-châi.

3. Sòa--lóh-khì, pō-tiú<sup>n</sup> kóng POJ chit-pêng ê sò-kiû pài-3 í-keng thia<sup>n</sup>--kòe, chit-má chhiá<sup>n</sup> Âng Úi-jîn chiū i ê liânsú sia<sup>n</sup>-bêng hoat-piáu i ê khòa<sup>n</sup>-hoat. (Kî-sit Âng Úi-jîn ū kià kòe 1-tiú<sup>n</sup> chhêng-gôan-su hō A-pí<sup>n</sup>--á, Hêng-chèng-ī<sup>n</sup> Iû Sek-khun ī<sup>n</sup>-tiú<sup>n</sup> kap KIP pō-tiú<sup>n</sup>, kóng kāng-khóan bô-sû-sít ê ōe, mē Tē<sup>n</sup> kàu-siū chin-chê phái<sup>n</sup>-thia<sup>n</sup>-ōe, chú-iàu sī beh iau-kiû thiat-ōa<sup>n</sup> KTH/ Kok-thui-hōe chû-jîm-úi-ôan Tē<sup>n</sup> kàu-siū.) Kāng-khóan ê ōe it-tít kóng, bē kám-kak kiàn-siàu. Góan í-keng thia<sup>n</sup> kah hîn-á kiōng beh se<sup>n</sup>-lân.
4. Su-tâi ê Iáu kàu-siū chiap teh kóng. I sī Tiong-hôa Bîn-kok Sia<sup>n</sup>-ūn Hák-hōe hōe-tiú<sup>n</sup>. I kóng ê ōe iáh-bô chin bêng-hián ê lí-iû chi-chhî TLPA, mā bô hóan-tùi POJ, khó-lêng sī i kin-pún tiôh m̄-bat iōng TLPA á-sī POJ siá kòe siá<sup>n</sup> mih-kiá<sup>n</sup>. Só-í, chiū sú-iōng-chiá lâi kóng, i sī 1-ê Tâi-gí su-siá ê bûn-bông. Góa siú<sup>n</sup> i ê kin-pún chû-tiú<sup>n</sup>: POJ kap TLPA lóng m-sī bûn-jî. I ê ōe góa kā thia<sup>n</sup>--khí-lâi, bô lám bô ne. M̄-chai i lâi beh kā Âng Úi-jîn tàu siá<sup>n</sup> khang?
5. Siōng bōe--á Kim-an chhut-pán-siā ê táng-sû-tiú<sup>n</sup> Chhòa Kim-an kóng. I ê lí-iû sī in kong-si í-keng tâu-chu chin-chê chî<sup>n</sup>, chhut-pán bô-gí kàu-kho-su,

- iōng--ê chù-im im-phiau sī Ng Kèng-liân lāu-su chú-tiu<sup>n</sup> ê TLPA kái-liōng-pán. Kóng kui-pòa<sup>n</sup>-po, ôan-chôan bô soeh-hók ê lèk-liōng: góan Kim-an bô kian-chhî ài iōng siá<sup>n</sup>-mih POJ á-s ī TLPA, Thong-iōng, in-ūi in m̄-bat, kan-ta<sup>n</sup> sī 1-ê seng-lí-lâng nā-tiā<sup>n</sup>. Nā ū pit-iàu, in ē-sái sūi-sî kái-pán.
6. Tī in chit 3-ê-lâng kóng-ōe ê tions-kan, góa nā chhōe-tiōh ki-hōe, ē iau-kiû hoat-piáu góa ê i-kiàn. Chiam-tùi Âng Úi-jîn, góa kóng: lán 2-lâng gôan-pún sī pêng-iú, góa bô beh kap lí sio-chiàn, mā bô hit ê pit-iàu, in-ūi che sī bô-kāng chân-chhù ê bûn-tê: góan kóng POJ sī jī, lín kóng TLPA sī im-phiau. Iáu-böe chiàn, lín tō seng su-ah, ná ē ū su-iàu koh chiàn--leh? Lí kóng Tē<sup>n</sup> kàu-siū hiah-ê tāng-ōe lóng siu<sup>n</sup> kòe-hūn, bô sū-sít, liân siá miâ liân-sú ê lâng mā chō-ké: 5-ê kóng bô, lêng-góa ū khan-siáp chhut-pán ê lī-ek thôan-thé bô sek-tong. I má-siōng hôe-èng kóng, siá miâ ū kái--kòe ah, lí bô khòa<sup>n</sup> nā-tiā<sup>n</sup>. Góa in kóng, he kái--ê sī in-ūi ū lâng hóan-tùi chiah kái, piáu-sī lí ê sim-thài gôan-pún tiōh-sī án-ne, bē-tàng koh chè<sup>n</sup>. Góa mā koh 1-pái kā i khàng: bô-chhai lí hiah-nih gâu, 10-kuí-nî lâi ê phah-pià<sup>n</sup> nā iōng tī POJ ê thui-sak, lí m̄-chai ē jōa ū sêng-chiū--leh. Góa kap Jū-hōng tong-chho mā chham-ka Tâi-ôan Gí-bûn Hák-hōe chò hôe-ôan, chò-hóe thó-lūn chè-tēng TLPA. Sī án-chóá<sup>n</sup> bôe--á thè-chhut? Lí sim-lâi ū-sò.
7. Chhòa Kim-an kóng liáu, góa kóng lín gôan-ì chhut-pán bô-gí chheh ê cheng-sîn tong-jiân ài khéng-tēng, m̄-koh piau-chún ná-chhiū<sup>n</sup> bô siá<sup>n</sup> thò-tòng, bô khó-lū tiōh hák-seng í-āu ê hák-sip su-iàu. Góa tit-chiap mñg: óh chit-

- chióng gí-giân, kám kan-ta<sup>n</sup> thák 1-pún kàu-kho-su tiōh kàu-khùi ah? Hák-seng tī khò-tâng í-gōa, nā beh chìn 1-pō khòa<sup>n</sup> khah chē mih-kiā<sup>n</sup>, chhiū<sup>n</sup> sió-soat, si-ko, hì-kék, sòa<sup>n</sup>-bûn, pêng-lūn, chham-khó-su, sù-tián, in-sai-kong-bih-tī-hia(Encyclopedia) téng-téng, lín hit-thò TLPA kái-liōng-pán ê chok-phín tī tó? Gōa-kok lâng beh lâi Tâi-ôan óh Tâi-gí, lín ū siá<sup>n</sup>-mih hō lâng thák? Siàu-liân-á beh khòa<sup>n</sup> Tâi-gí, lín ū siá<sup>n</sup>-mih bâng-châm ê-tàng hō in khòa<sup>n</sup>? Ú siá<sup>n</sup> nñg-thé ê-tàng hō in iōng lâi phah chok-phín? Hô-hóng lín mā bô chiong kái-liōng-pán ê TLPA khòa<sup>n</sup> chò bûn-jī..... Óh gí-giân m̄-sī óh ê-hiáu kóng kúi-kù-á òe tiōh hó, ū sim ê lâng ài koh chìn-jip hit-ê bûn-hòa hē-thóng, he sī chē-chē lâng keng-kòe to-nî ê liáp-chech chiah hêng-sêng--ê. Ah lín tī chia lóng bô mih-kiā<sup>n</sup>, kiò Tâi-ôan-lâng beh án-chóá<sup>n</sup> koh óh-lòh--khì?
8. Kiat-böe, góa kā pau-koah pō-tiú<sup>n</sup> kap châi-tiû<sup>n</sup> ê tui-hong kóng, POJ kàu-ta<sup>n</sup> iáu-böe sí, iáu ū 1-si-á khùi-méh, ôan-chôan sī Tâi-ôan-lâng m̄-kia<sup>n</sup> sí, ū sìn-sim, ē kian-chhî ê kiat-kó. Tī bô siá<sup>n</sup>-mih chèng-tī sè-lék ê chêng-hêng hā tiām-tiām choh-sit, tong-jiân beh iau-kiû pêng-hóan châ-chêng sór-siū ê pek-hâi.
9. Chng lüt-su ôan-chôan bô kóng-tiōh 1-kù chi-chhî TLPA ê òe. Pō-tiú<sup>n</sup> mā ôan-chôan bô hôe-èng Âng Úi-jîn kái-sàn KTH kap thiat-siau Tē<sup>n</sup> kàu-siū chú-úi ê sò-kiû. Ún-giân kiàn-gī KIP iau-chhiá<sup>n</sup> POJ, TLPA, Thong-iōng chit 3-ê tīn-iâ<sup>n</sup> ê lâng tī 1-kò-góeh lâi chiong chu-liâu chéng-lí kau-chhut, chò 1-ê kong-khai ê tián-lám, hō tâi-chiòng liáu-kái, phah hun-sò, chòe-āu chiah



chhái-iōng, góa mā ū kóng, khó-sioh  
pō-tiú<sup>n</sup> beh kóa<sup>n</sup>-khì lēng-gōa ê hōe, bō  
siōng-sè thia<sup>n</sup>. M-koh góa siū<sup>n</sup> í Tē<sup>n</sup>  
kàu-siū ê chū-úi kak-sek ē-sái tī KTH  
thui-tōng chit-hāng tāi-chì.

5/22-àm chìn-chêng, Tē<sup>n</sup>/Tiu<sup>n</sup> 2-ūi Tâi-  
gí gián-kiù ê tāi-chiàng kap góa kóng hó-sè,  
in tī hōe-tiû<sup>n</sup> chē--leh tō hó, ōe hō góa  
kóng. Tān-sī in lóng ū chhiong-hun ê chún-  
pī. Jū-hōng koh tī thàu-chá 5-tiám khí-  
chhñg siá 1-hūn lūi-sù pī-chiàn-su beh  
hóan-pok Âng Ûi-jîn, hōe-lék chin kiōng.  
Góa kóng ê ōe chin chē tit-chiap ín-iōng i ê  
ōe. Chin kám-sim.

Góa cha-mê 10-tiám-gōa tñg-lâi Tâi-  
tiong, che sī góa hō tāi-ke ê chiàn-chêng  
pò-kò. Chhiá<sup>n</sup> chí-kàu. Nā ū bō chèng-khak,  
á-sī làu-kau ê sór-chāi, chhiá<sup>n</sup> kap Tē<sup>n</sup>/Tiu<sup>n</sup>  
kàu-siū mñg khah chheng-chhó--leh.

Phái<sup>n</sup>-sè, siá kah lo-li-lo-thi, chiah-nih  
tñg, lín ū nāi-sim khòa<sup>n</sup>, ló-lát. Chhiá<sup>n</sup> chí-  
kàu, ài kiâ<sup>n</sup> ê lō iáu chiâ<sup>n</sup> tñg. 2004.4.22